

## Gryphius, Andreas: 42. (1640)

- 1 Gleich als ein wanders mann'/ im fall die trübe nacht
- 2 Mitt dicker fünsternus lufft erdt vndt see verdecket
- 3 Irt trawrig hin vnd her/ vnd mitt vill furcht erschrecket'
- 4 Weis nirgendts wo er geht; siht nimmer was er macht:
- 5 Nicht anders ists mit mir. doch wen der mond' auffwacht
- 6 Vndt seiner stralen kertz' im wolcken-haus anstecket
- 7 Bald findt er weg vnd raht/ so wirdt mein Geist erwecket:
- 8 Wen jhr mich ewrer gunst vndt schreiben würdig acht.
- 9 Last ja den leit-stern fest wol ed'le Jungfraw stehen.
- 10 Last ja dis schöne licht mir nimmer vntergehen:
- 11 Das licht/ drin redlikeit vnd tugend sich ergetzt.
- 12 Wehrt bin ich nicht das jhr mir was ich wil gewehret
- 13 Doch wärmbt der Sonnen glantz was frost vnd schnee verheeret.
- 14 Wie niedrig bis auch ligt wie hoch sie wirdt geschätzt.

(Textopus: 42.. Abgerufen am 23.01.2026 von <https://www.textopus.de/poems/54466>)